

摘藻堂四庫全書薈要

經部

欽定四庫全書薈要

經部

春秋尊王發微卷二



欽定四庫全書蒼要

春秋尊王發微

卷一

隱公

卷二

桓公

卷三

莊公

卷四

閔公

卷五

僖公

卷六

文公

卷七

宣公

卷八

成公

卷九

襄公

卷十

昭公

卷十一

定公

卷十二

哀公

臣等謹案春秋尊王發微十二卷宋孫復撰
中興書目載復尚有總論三卷今已佚存者
獨此書耳復之說經不依傳注好為獨闢之
學故當時毀譽相半而常秩葉夢得兩人一
則譏其如商鞅之法失于過刻一則譏其廢
傳從經又不盡達經例每自抵牾惟朱子謂

其雖未深于聖經然推言治道凜凜足畏終
得聖人意思故春秋家至今重焉自唐以前
記春秋者皆本三傳自啖助趙匡陸淳之流
始稍稍自出己意韓愈稱盧仝春秋三傳束
高閣獨抱遺經究終始則掃除舊解實始于
仝復之說經又踵仝而起者也仝書今不傳
復之學遂開南宋諸儒之先亦可謂毅然自
立矣其過于師心者分

乾隆四

十年二月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書蒼要卷一千二百五十五

經部

春秋尊王發微卷一

宋 孫復 撰

隱公名息姑惠公子平王四十九年即位隱諡也隱拂不成曰隱

元年春王正月

孔子之作春秋也以天下無王而作也非為隱公而作也然則春秋之始于隱公者非他以平王之所終

也何者昔者幽王遇禍平王東遷平既不王周道紀
矣觀夫東遷之後周室微弱諸侯强大朝覲之禮不
修貢賦之職不奉號令之無所束賞罰之無所加壞
法易紀者有之變禮亂樂者有之弑君戕父者有之
攘國竊號者有之征伐四出蕩然莫禁天下之政中
國之事皆諸侯分裂之平王庸暗歷考逾惠莫能中
興播蕩陵遲逮隱而死夫生猶有可待也死則何所
為哉故詩自黍離而降書自文侯之命而絕春秋自

隱公而始也詩自黍離而降者天下無復有雅也書自文侯之命而絕者天下無復有誥命也春秋自隱公而始者天下無復有王也夫欲治其末者必先端其本嚴其終者必先正其始元年書王所以端本也正月所以正始也其本既端其始既正然後以大中之法從而誅賞之故曰元年春王正月也隱公曷為不書即位正也五等之制雖曰繼世而皆請于天子隱公承惠天子命也故不書即位以見正焉

三月公及邾儀父盟于蔑

盟者亂世之事故聖王在上闕無聞焉斯蓋周道陵
遲衆心離貳忠信殆絕譎詐交作於是列國相與始
有歃血要言之事爾凡書盟者皆惡之也邾附庸國
儀父字附庸之君未得列於諸侯故書字以別之桓
十七年公會邾儀父盟于趯翠軌反莊二十三年蕭叔
朝公是也春秋之法惡甚者日其次者時非獨盟也
以類而求二百四十二年諸侯罪惡輕重之跡煥然

可得而見矣蔑魯地

夏五月鄭伯克段于鄆

於晚反

段鄭伯弟素諸侯殺大夫稱人稱國殺世子母弟稱君此鄭伯弟可知也克者力勝之辭段鄭伯弟以鄭伯之力始勝之者見段驕悍難制國人莫抗也鄭伯養成段惡至于用兵此兄不兄弟不弟也鄭伯兄不兄弟不弟故曰鄭伯克段于鄆以交譏之鄆鄭地

秋七月天王使宰咺

呼阮反

來歸惠公仲子之賵

方鳳反

天王使宰咺來歸惠公仲子之賵非禮也仲子孝公
妾惠公母惠公既君仲子不稱夫人者妾母不得稱
夫人故曰惠公仲子也其曰惠公仲子者非他以別
惠公之母爾文九年秦人來歸僖公成風之襚皆此
義也仲字子宋姓車馬曰賵衣衾曰襚珠玉曰賻扶
反宰咺天子士宰官咺名天子之士名

九月及宋人盟于宿

及宋人盟皆微者也外微者稱人內微者稱及不可

言魯人故也

冬十有二月祭

側界反

伯來

祭伯天子卿不稱使者非天子命也非天子命則奔也不言奔非奔也祭伯私來也祭伯私來故曰祭伯來以惡之祭國伯爵

公子益師卒

益師孝公子內大夫也內大夫生死皆曰公子公孫與氏不以大夫目之者惡世祿也古者諸侯之大夫

皆命于天子周室既微其制遂廢故魯之臧氏仲孫氏叔孫氏季孫氏晉之狐氏趙氏荀氏郤氏欒氏范氏齊之高氏國氏崔氏衛之甯氏孫氏皆世執其政莫有命于天子者此可謂世祿者矣春秋詳內略外故獨卒內大夫以疾之

二年春公會戎于潛

公會戎于潛聖王不作諸戎亂華肆居中國與諸侯仇故公會戎于潛諸侯非有天子之事不得出會諸

侯况會戎哉凡書會者皆惡之也潛魯地

夏五月莒人入向

舒亮反

莒小國也入者以兵入也莒小國以兵入向者隱桓之際征伐用師國無小大皆專而行之故莒人以兵入向其稱人者春秋小國卿大夫皆略稱人以其土地微陋其禮不足故也

無駭帥師入極

無駭公子展孫不氏未命也極附庸國外莒人入向

內無駭帥師入極天子不能誅此周室陵遲可知也
秋八月庚辰公及戎盟于唐

盟不相信爾故割牲歃血以要之邾儀父中國也公
與中國盟猶曰不可與戎盟于唐甚矣唐魯地

九月紀裂繻來逆女

惡不親迎也諸侯親迎禮之大者在易咸卦兌上艮
下艮少男先下女親迎之象也故曰咸感也二氣感
應以相與又曰天地感而萬物化生聖人感人心而

天下和平是以文王親迎于渭以啓周室詩人美之
紀侯不知親迎之大故斥言紀裂繻來逆女以惡之
也裂繻紀大夫未命故不氏

冬十月伯姬歸于紀

伯姬紀裂繻所逆內女也伯字姬魯姓婦人謂嫁曰
歸

紀子伯莒子盟于密

紀本侯爵此稱子伯闕文也左氏作子帛杜預言裂

繻字者蓋附會其說爾故不取焉

十有二月乙卯夫人子氏薨

隱公夫人也夫人薨志者夫人小君與君一體故志之也子宋姓不地者夫人薨有常處不言葬者五月而葬也

鄭人伐衛

孔子曰天下有道則禮樂征伐自天子出天下無道則禮樂征伐自諸侯出自諸侯出蓋十世希不失矣

自大夫出五世希不失矣夫禮樂征伐者天下國家之大經也天子尸之非諸侯可得專也諸侯專之猶曰不可況大夫乎吾觀隱桓之際諸侯無小大皆專而行之宣成而下大夫無內外皆專而行之其無王也甚矣故孔子從而錄之正以王法凡侵伐圍入取滅皆誅罪也鄭人微者

三年春王二月

羣公之年正月書王者九十二二月書王者二十三

月書王者一十七春秋之法唯元年不以有事無事
皆書王正月餘年事在正月則書正月桓二年春王

正月戊申宋督弑其君與夷及其大夫孔父十年春
王正月庚申曹伯終生卒之類是也事在二月則書

二月此年春王二月己巳日有食之四年春王二月

莒人伐杞之類是也事在三月則書三月七年春王

三月叔姬歸于紀莊十二年春王三月紀叔姬歸于

鄫音攜之類是也一時無事則書首月莊五年春王正

月十一年春王正月之類是也

已巳日有食之

言日不言朔者凡日食言日言朔食正朔也言日不言朔失其朔也言朔不言日失其日也不言日不言朔日朔俱失也桓三年秋七月壬辰朔日有食之莊二十五年六月辛未朔日有食之食正朔也此年二月已巳日有食之僖公十二年三月庚午日有食之失其朔也桓十七年冬十月朔日有食之失其日也

莊十八年三月日有食之僖十五年夏五月日有食
之日朔俱失也此皆歷象錯亂攝提無紀周室不綱
太史廢厥職或失之先或失之後夏書曰先時者殺
無赦不及時者殺無赦故春秋詳而錄之以正其罪
三月庚戌天王崩

平王也天子崩諸侯卒皆志者受終易代不可不見
也天子崩七月而葬諸侯卒五月而葬此禮之常也
故不書焉凡書葬者非常也是故天王崩書葬者五

桓襄匡簡景是也不書葬者四平惠定靈是也不書
崩不書葬者三莊僖頃是也桓襄匡簡景書葬者皆
非常也平惠定靈不書葬者皆得常也莊僖頃不書
崩不書葬者周室微弱失不告也失不告崩故葬不
可得而書也然則襄王而葬書者惡內也案文六年
八月乙亥晉侯驩卒冬十月公子遂如晉葬晉襄公
八年八月戊申天王崩九年二月叔孫得臣如京師
葬襄王魯皆使卿會是天子諸侯可得而齊也故書

襄王之葬以惡內

夏四月辛卯尹氏卒

尹氏天子卿言氏者起其世也秦誓曰罪人以族官人以世夏商之亂政也周既失道其政亦然案節南山家父刺幽王之詩也稱尹氏太師維周之氏則尹氏世卿其來久矣見于此者因其來赴誅之也

秋武氏子來求賻

武氏世卿也其言武氏子父死未葬也武氏子來求

賻者武氏子父死未葬故來求賻賻不可求來求非禮也

八月庚辰宋公和卒冬十有二月齊侯鄭伯盟于石門石門齊地

癸未葬宋穆公

夫赴告弔會史策之常也貶惡誅亂聖師之筆也春秋書諸侯之卒葬者豈徒紀其歲時從其赴告弔會而已哉蓋以周室陵遲諸侯僭亂變古易常驕蹇不

道生死以聖王之法治之也是故諸侯之卒書葬者
九十三不書葬者四十一凡書葬者皆惡之也禮天
子崩稱天命以諡之諸侯薨請諡于天子大夫卒受
諡于其君大行受大名小行受小名所以懲惡而勸
善也東遷之後其禮遂廢諸侯之葬也不請諡于天
子皆自諡之非獨不請諡于天子皆自諡之而又僭
稱公焉故孔子從而錄之正以王法唯吳楚之君僭
極惡大貶不書葬此非例之常宋公爵又五月而葬

書者不請謚也

四年春王二月莒人伐杞取牟婁

二月莒人伐杞取牟婁甚之也莒人二年入向天子不能誅故此肆然伐杞取牟婁牟婁杞邑

戊申衛州吁弑其君完

州吁不氏未命也易曰履霜堅冰陰始凝也馴致其道至堅冰也又曰積善之家必餘慶積不善之家必餘殃臣弑其君子弑其父非一朝一夕之故其

所由來者漸矣由辨之不早辨也斯聖人教人君御
臣子防微杜漸之深戒也蓋以臣子之惡始于微而
積于漸久而不已遂成于弑逆之禍如履霜而至于
堅冰也若辨之不早則鮮不及矣故春秋之世臣弑
其君者有之子弑其父者有之弟弑其兄者有之婦
弑其夫者有之是時紀綱既絕蕩然莫禁孔子懼萬
世之下亂臣賊子交軌乎天下也故以聖王之法從
而誅之其誅之也罪惡有三大夫弑君則稱名氏以

誅之謂大夫體國不能竭力盡能輔其不逮包藏禍
心以肆其惡故稱名氏以誅之此年衛州吁弑其君
完莊八年齊無知弑其君諸兒宣十年陳夏徵舒弑
其君平國之類是也微者弑君則稱人以誅之微者
謂非大夫名氏不登于史策故稱人以誅之文十六
年宋人弑其君杵臼十八年齊人弑其君商人襄三
十一年莒人弑其君密州之類是也衆弑君則稱國
以誅之衆謂上下乖離姦宄並作肆禍者非一言舉

國之人可誅也故稱國以誅之文十八年莒弑其君
庶其成十八年晉弑其君州蒲定十三年薛弑其君
比之類是也

夏公及宋公遇于清

遇者不期也不期而會曰遇詩稱邂逅相遇適我願
兮是也諸侯守天子土非享覲不得逾境此言公及
宋公遇于清者惡其自恣出入無度清衛地

宋公陳侯蔡人衛人伐鄭秋翬帥師會宋公陳侯蔡人

衛人伐鄭

夏宋公陳侯蔡人衛人伐鄭秋翬帥師會宋公陳侯蔡人衛人伐鄭內外連兵肆然不顧以疾于鄭其惡可知也蔡衛稱人稱人微者翬不氏未命也

九月衛人殺州吁于濮音卜

稱人以殺討賊亂也其言于濮者桓公被殺至此八月惡衛臣子緩不討賊俾州吁出入自恣也濮衛地冬十有二月衛人立晉

人者衆辭嗣子有常位故不言立言立非正立也州
吁既死衛國無君故國人舉公子晉立之諸侯受國
于天子非國人可得立也故曰衛人立晉以誅其惡
五年春公觀魚于棠

觀魚非諸侯之事也天子適諸侯諸侯朝天子無非
事者動必有為也故孟子曰天子適諸侯曰巡狩巡
狩者巡所守也諸侯朝于天子曰述職述職者述所
職也是故春省耕而補不足秋省斂而助不給隱公

怠棄國政春觀魚于棠可謂非事者矣棠魯地

夏四月葬衛桓公

十四月葬

秋衛師入郟九月考仲子之宮

考成也仲子惠公母隱公祖母元年天王使宰咺來歸惠公仲子之賵故隱公考仲子之宮祭之元年天王使宰咺來歸惠公仲子之賵非禮也隱公以是考仲子之宮祭之此又甚矣夫宗廟有常故公夫人之

卷一
廟皆不書焉此年考仲子之宮成六年立武宮定元年立煬宮皆譏其變常也

初獻六羽

初始也羽舞者所執大雉之羽也其言初獻六羽者魯僭用天子禮樂舞則八佾孔子不敢斥也故因此減用六羽以見其僭天子之惡且經言考仲子之宮初獻六羽則羣公皆用八佾可知也唯稱羽者婦人之宮不用干舞

邾人鄭人伐宋

邾序鄭上者邾主乎伐宋也

螟

螟蟲灾也食苗心曰螟食葉曰蠶特食節曰賊食根

曰蟲

冬十有二月辛巳公子彊苦侯反卒

公子彊臧僖伯也孝公子

宋人伐鄭圍長葛

九月邾人鄭人伐宋故宋人伐鄭圍長葛長葛鄭地
六年春鄭人來輸平

其言來輸平者鄭人來輸誠于我平四年翬會諸侯
伐鄭之怨也平者釋憾之辭

夏五月辛酉公會齊侯盟于艾

艾魯地

秋七月

春秋編年必具四時故雖無事皆書首月不遺時也

冬宋人取長葛

長葛鄭邑天子所封非宋人可得取也宋人前年伐鄭圍長葛此而取之故言伐言圍言取悉其惡以誅之也

七年春王三月叔姬歸于紀

叔姬伯姬之媵至是乃歸待年父母國也媵書者為

莊十二年歸于鄫

音起

媵侯卒

不日不名者滕入春秋為小國之君卒或日不日或名不名者以其微弱其禮不足畧之也

夏城中丘

城邑宮室高下大小皆有王制不可妄作是故城一邑新一廡作一門築一圃時與不時皆詳而錄之此年夏城中丘桓五年夏城祝丘莊二十九年冬十有二月城諸及防文十二年冬十有二月季孫行父帥師城諸及鄆定十四年秋城莒父及霄僖二十年春

新作南門定二年冬十月新作雉門及兩觀之類是也時謂周之十二月夏之十月非此不時也然得其時者其惡小非其時者其惡大此聖人愛民力重興作懲僭恣之深旨也中丘魯邑

齊侯使其弟年來聘

列國相聘非禮也斯皆東遷之後諸侯橫恣連衡自固以相比周乃有玉帛交聘之事爾是故大國聘而不朝小國朝而不聘小國力弱可致大國地廣兵衆

不可得而屈也故但使大夫來聘結歡通問而已凡書者皆惡之也

秋公伐邾冬天王使凡伯來聘

天王使凡伯來聘非天子之事也桓王不能興衰振治統制四海以復文武之業反同列國之君使凡伯來聘此桓王之為天子可知也凡伯天子卿凡國伯爵

戎伐凡伯于楚丘以歸

凡伯寓衛戎伐凡伯以歸言伐用兵也楚丘衛地地以楚丘者責衛不能救難錄以歸者惡凡伯不死位八年春宋公衛侯遇于垂

垂衛地

三月鄭伯使宛來歸枋

必彭反

庚寅我入枋

枋鄭邑天子所封非魯土地故曰來歸定十年齊人來歸鄆音運謹龜陰田皆此義也先言歸而後言入者鄭不可歸魯不可入也鄭人歸之魯人受之其罪一

也入者受之之辭宛不氏未命也

夏六月己亥蔡侯考父卒辛亥宿男卒

秋七月庚午宋公齊侯衛侯盟于瓦屋

此言庚午宋公齊侯衛侯盟于瓦屋者甚之也諸侯日熾紛紛籍籍相與為羣歆血要言自是卒不可制也瓦屋周地

八月葬蔡宣公

三月而葬

九月辛卯公及莒人盟于浮來

公與莒人盟非莒人之罪也凡公與外大夫盟內斥
言公外大夫稱人惡在公也此年公及莒人盟于浮
來成二年公及楚人秦人宋人陳人衛人鄭人齊人
曹人邾人薛人鄆人盟于蜀是也內不言公外書大
夫名氏惡在大夫也莊十有二年及齊高傒盟于防
文二年及晉處父盟是也浮來莒地

螟

冬十有二月無駭卒

不氏未命也九年挾卒同此

九年春天王使南季來聘

南季天子大夫南氏季字

三月癸酉大雨震電庚辰大雨

于付反雪

周之三月夏之正月也未當大雨震電既大雨震電
又不當大雨雪甚哉八日之間天變若此也

挾卒夏城郎

郎魯地

秋七月冬公會齊侯于防

防魯地

十年春王二月公會齊侯鄭伯于中丘

此言二月公會齊侯鄭伯于中丘者公末年出入無
度不顧憂慮于內數會諸侯于外也十一年時來之
會同此

夏翬帥師會齊人鄭人伐宋六月壬戌公敗宋師于菅

古顏 反 辛未取郟 告辛巳取防

夏翬帥師會齊人鄭人伐宋六月壬戌公敗宋師于
管辛未取郟辛巳取防甚矣公與翬傾衆悉力共疾
于宋又浹日而取二邑故君臣並錄以疾之管宋地
秋宋人衛人入鄭宋人蔡人衛人伐戴鄭伯伐取之

宋人蔡人衛人伐戴戴小國也三國之師既退鄭伯
見利忘義乘戴之弊伐而取之其惡可知也

冬十月壬午齊人鄭人入郟

邠小國

十有一年春滕侯薛侯來朝

諸侯朝天子禮也諸侯朝諸侯非禮也斯皆周室不
競干戈日尋以大陵小小國不得已而為之爾是故
齊晉宋衛未嘗朝魯而滕薛邾杞來朝奔走而不暇
也齊晉宋衛未嘗來朝魯者齊晉盛也宋衛敵也滕
薛邾杞來朝奔走而不暇者土地狹陋兵衆寡弱不
能與魯抗也春秋之法諸侯非有天子之事不得踰

境凡書朝者皆惡之也

夏五月公會鄭伯于時來

時來鄭地

秋七月壬午公及齊侯鄭伯入許

案前年二月公會齊侯鄭伯于中丘夏翬帥師會齊人鄭人伐宋六月壬戌公敗宋師于菅辛未取郟辛巳取防此年五月公會鄭伯于時來秋七月壬午公及齊侯鄭伯入許甚矣公二年之中與齊侯鄭伯連

兵自恣以為不道其惡若此也

冬十有一月壬辰公薨

公薨不地弑也孰弑之桓公弑也曷為不言桓公弑
內諱弑也故弑君之賊皆不書焉不言葬者以侯禮
而葬也隱雖見弑其臣子請謚于周以侯禮而葬故
不書焉

春秋尊王發微卷一

欽定四庫全書薈要卷一千二百五十六

經部

春秋尊王發微卷二

宋 孫復 撰

桓公名允惠公子隱公弟桓王九年即位桓諡也闢土服遠曰桓

元年春王正月公即位

即位常事書者桓弑隱自立非天子命也

三月公會鄭伯于垂

垂衛地

鄭伯以璧假許田

許田者許男之田也天子所封不可假也鄭與許接壤故鄭伯以璧假其田二國擅假天子之田自恣若此然猶愈乎用兵而取也故曰鄭伯以璧假許田

夏四月丁未公及鄭伯盟于越

越衛地

秋大水

水不潤下也昔者聖王在上五事修而彛倫叙則休
徵應之故曰肅時雨若乂時暘若哲時燠若謀時寒
若聖時風若聖王不作五事廢而彛倫攸斁則咎徵
應之故曰狂恒雨若僭恒暘若豫恒燠若急恒寒若
蒙恒風若春秋之世多災異者聖王不作故也然自
隱迄哀聖王不作者久矣天下之災異多矣悉書之
則不可勝其所書矣是故孔子惟日食與內災則詳
而書之外災則或舉其一或舉于齊鄭宋衛則天下

之異從可見矣

冬十月

二年春王正月戊申宋督弑其君與夷及其大夫孔父
此言宋督弑其君與夷及其大夫孔父者甚之之辭
也督肆禍心既弑其君與夷又殺其大夫孔父可謂
甚矣故曰宋督弑其君與夷及其大夫孔父以誅之
孔父字者天子命大夫也古者諸侯之大夫皆命于
天子故春秋列國時或有之宋孔父鄭祭仲魯單伯

陳女叔之類是也

滕子來朝

滕稱子者案杞公爵也滕薛皆侯也入春秋杞或稱侯或稱伯或稱子皆降也滕或稱侯或稱子稱侯正也稱子降也薛或稱侯或稱伯稱侯正也稱伯降也此蓋聖王不作諸侯自恣朝會不常彼三國者力既不足禮多不備或以侯禮而朝或以伯子而會故孔子從而錄之以見其亂也滕子朝弑逆之人其惡可

知

三月公會齊侯陳侯鄭伯于稷以成宋亂

弑君之賊諸侯皆得討之宣十一年楚人殺陳夏徵舒是也此言公會齊侯陳侯鄭伯于稷以成宋亂者惡不討賊也公會齊侯陳侯鄭伯于稷本為宋討賊既而不討者督弑殤公桓弑隱亦懼諸侯之討已故翻然與督比周同惡相濟以成宋亂受賂而返也夏四月取郟大鼎于宋戊申納于大廟

其言夏四月取郟大鼎于宋戊申納于大廟者甚之也桓弑逆之人受督弑逆之賂以事于周公之廟可謂甚矣

秋七月杞侯來朝

滕子不月者與督弑同月

蔡侯鄭伯會于鄧九月入杞

七月杞侯來朝九月魯人入杞皆非禮也不出主名微者

公及戎盟于唐冬公至自唐

至者春秋亂世諸侯出入無度危之也案公行一百七十六皆不以王事舉其或往返踰時釁深惡重者則書其至以危之餘則否焉是故書至者八十二也

三年春正月

羣公之年書月則書王明此正朔天王所頒也此不王而月者桓弑隱自立天子不能誅若曰此正朔非天王所頒桓之所出也不于元年二年見其罪者元

年方端本正始二年宋督弑其君與夷非桓之事故
此年從其出會齊侯以正其罪

公會齊侯于羸

羸齊地

夏齊侯衛侯胥命于蒲

齊侯衛侯相命于蒲非正也雖無歃血要盟之事古
者諸侯非王事不踰境蒲衛地

六月公會杞侯于郕

魯前年入杞公會杞侯于郕自恣若此

秋七月壬辰朔日有食之既

言日言朔食正朔也既盡也日有食之陰侵陽臣侵君之象也凡日食人君皆當戒懼側身修德以消其咎故夏書曰乃季秋月朔辰弗集于房瞽奏鼓嗇夫馳庶人走小雅曰十月之交朔日辛卯日有食之亦孔之醜是也

公子翬如齊逆女九月齊侯送姜氏于謹公會齊侯于

謹

公子翬氏者桓公命也孔子曰關雎樂而不淫哀而不傷孔子之言豈徒然哉蓋傷周道陵遲婚姻失道無賢女輔佐君子致關雎后妃之德以化天下也是時文姜亂魯驪姬惑晉南子傾衛夏姬喪陳上下化之滔滔皆是不可悉舉也故自隱而下夫人內女出處之迹皆詳而錄之以懲以戒為萬世法噫夫夫婦婦風教之始人倫之本也可不重乎是故昏禮之重

莫重乎親迎詩稱大妣之家在洽之陽在渭之涘文
王親迎于渭則諸侯親迎其所來也遠矣此言公子
翬如齊逆女齊侯送姜氏于謹公會齊侯于謹皆非
禮也諸侯親迎不使卿父母送女不踰境公既使公
子翬逆女齊侯送姜氏來也又自往會非禮可知也
夫人姜氏至自齊

此齊侯送姜氏公受之于謹也公受姜氏于謹不以
謹至者不與公受姜氏于謹也故曰夫人姜氏至自

齊以正其義

冬齊侯使其弟年來聘有年

桓立十八年唯此言有年者是未嘗有年也書者著桓公為國不能勤民務農若是也

四年春正月公狩于郎

狩冬田也天子諸侯四時必田者蓋安不忘危治不忘亂講武經而教民戰也豈徒肆盤遊逐禽獸而已哉然禽獸多則五穀傷不可不捕也故因田以捕之

上以供宗廟之鮮下以除稼穡之害故田必以時殺
必由禮田不以時謂之荒殺不由禮謂之暴唯荒也
妨于農唯暴也殄于物此聖人之深戒也常事書者
周之正月夏之十一月也四時之田用孟月正月公
狩于郎不時也

夏天王使宰渠伯糾來聘

宰渠伯糾周大夫渠氏伯糾字也桓公弑逆之人桓
王不能誅反使宰渠伯糾來聘此桓王之為天子可

知也下無二時脫之七年同此

五年春正月甲戌巳丑陳侯鮑卒

此言甲戌巳丑陳侯鮑卒闕文也蓋甲戌之下有脫事爾且諸侯未有以二日卒者也

夏齊侯鄭伯如紀天王使仍叔之子來聘

仍叔周大夫仍國叔字也其曰仍叔之子來聘者父在使子之辭也

葬陳桓公城祝丘

祝丘魯地

秋蔡人衛人陳人從王伐鄭

桓王以蔡人衛人陳人伐鄭鄭伯叛王也其言蔡人衛人陳人從王伐鄭者不使天子首兵也案十四年宋人以齊人蔡人衛人陳人伐鄭僖二十六年公以楚師伐齊定四年蔡侯以吳子及楚人戰于柏舉皆曰以此不使天子首兵可知也桓王親伐下國惡之大者曷為不使首兵天子無敵非鄭伯可得仇也故

曰蔡人衛人陳人從王伐鄭以尊之尊桓王所以甚
鄭伯之惡也夫鄭同姓諸侯密邇畿甸桓王親以三
國之衆伐之拒而不服此鄭伯之罪不容誅矣人者
衆辭

大雩

雩求雨之祭建巳之月常祀也故經無六月雩者建
午建申之月非常則書謂之大者雩于上帝也天子
雩于上帝諸侯雩于山川百神魯諸侯也雩于山川

百神禮也雩于上帝非禮也噫是時周室既微王綱既絕禮樂崩壞天下蕩蕩諸侯之僭者多矣舉于魯則諸侯僭之從可見矣然春秋魯史孔子不敢斥也其或災異非常改作不時者則從而錄之以著其僭天子之惡隱五年九月考仲子之宮初獻六羽此年秋大雩六年八月壬午大閱閔二年夏五月乙酉吉禘于莊公僖三十一年夏四月四卜郊不從乃免牲宣三年春王正月郊牛之口傷改卜牛牛死乃不郊

定二年夏五月壬辰雉門及兩觀災之類是也嗚呼
其旨微矣

蝨音終

蟲災也

冬州公如曹

六年春正月寔來

闕文也三傳咸謂寔來州公者以上承五年冬州公
如曹下無異事言之爾然極考其說義皆未安竊謂

州公如曹寔來其間文有脫漏也

夏四月公會紀侯于郕

秋八月壬午大閱

八月不時也大閱非禮也大閱仲冬簡車馬八月不時可知也大閱大蒐謂天子田

蔡人殺陳佗

稱人以殺討賊亂也先儒言陳侯鮑卒佗殺太子自立故蔡人誘而殺之然經無所見也

九月丁卯子同生

同世嫡桓公子其曰子同生者無父辭也桓弑逆之人罪當誅絕故以無父之辭書之所以甚桓公之惡也

冬紀侯來朝

七年春二月己亥焚咸丘

焚者火之也咸丘附庸以人攻之猶曰不可火之則又甚矣

夏穀伯綏來朝鄧侯吾離來朝

春秋之法諸侯不生名生名惡之大者也此年穀伯綏來朝鄧侯吾離來朝十五年鄭伯突出奔蔡莊十年荆敗蔡師于莘以蔡侯獻舞歸僖十九年宋人執滕子嬰齊二十五年衛侯燬滅邢昭十一年楚子虔誘蔡侯般殺之于申是也桓大逆之人諸侯皆得殺之穀伯綏鄧侯吾離不能致討反交臂而來朝故生而名之也

八年春正月己卯烝

烝冬祭也春興之非禮也祭祀從夏時周之正月夏之十一月也四時之祭用孟月

天王使家父來聘

家父天子大夫家氏父字

夏五月丁丑烝

夏五月丁丑烝瀆亂之甚也

秋伐邾

不出主名微者

冬十月雨

于付反

雪祭

側界反

公來遂逆王后于紀

天子不親迎取后則使三公逆之祭公三公書者為
遂事起也其言祭公來者祭公來謀逆后之期也桓
王取后于紀魯受命主之故祭公來謀逆后之期其
曰遂逆王后于紀者祭公來謀逆后之期既謀之則
當復命于天子命之逆則逆之不可專也祭公不復
命于王專逆王后于紀故曰遂以惡之不言逆女者

王后重矣非諸侯夫人可得齊也故不言逆女也

九年春紀季姜歸于京師

此前年祭公所逆王后也姜紀姓季字案襄十五年
劉夏逆王后于齊不言齊姜歸于京師此言季姜歸
于京師者不與祭公遂逆王后于紀也王后天下母
取之逆之皆天子命非人臣可得專也祭公遂逆王
后于紀非天子命故不曰王后歸于京師而曰紀季
姜歸于京師也

夏四月秋七月冬曹伯使其世子射

音亦又音夜

姑來朝

諸侯相朝猶曰不可况使世子乎曹伯疾使其世子射姑來朝非禮也

十年春王正月

此年書王者王無十年不書也十年無王則人道滅矣

庚申曹伯終生卒夏五月葬曹桓公秋公會衛侯于桃丘弗遇

秋公會衛侯于桃丘弗遇衛侯不來安之也桃丘衛地

冬十有二月丙午齊侯衛侯鄭伯來戰于郎

來戰于郎不言侵伐者不與齊衛鄭加兵于我也郎魯地也以魯則魯與戰可知矣不出主名者三國無故加兵于我不道之甚故以三國自戰為文也

十有一年春正月齊人衛人鄭人盟于惡曹

謀魯也惡曹地名闕

夏五月癸未鄭伯寤生卒秋七月葬鄭莊公

三月而葬

九月宋人執鄭祭

側界反

仲突歸于鄭鄭忽出奔衛

宋人宋公也宋公執人權臣廢嫡立庶以亂于鄭故奪其爵祭仲字者天子命大夫也突忽庶弟突不正歸于鄭無惡文者惡在祭仲為鄭大臣不能死難聽宋偪脅遂忽立突惡之大者况是時忽位既定以鄭之衆宋雖無道亦未能畢制命于鄭仲能竭其忠力

以距于宋則忽安有見逐失國之事哉故揚之水閔
忽之無忠臣良士終以死亡者謂此也嗣子既葬稱
子鄭莊既葬忽不稱子者惡忽不能嗣先君未踰年
失國也故參譏之

柔會宋公陳侯蔡叔盟于折

之設切

柔不氏內大夫之未命者蔡叔蔡侯弟也案諸侯母
弟未命為大夫者皆字此年柔會宋公陳侯蔡叔盟
于折十五年許叔入于許十七年蔡季自陳歸于蔡

莊三年紀季以鄆入于齊之類是也折魯地

公會宋公于夫

扶音

鍾冬十有二月公會宋公于闕

口暫切

夫鍾邾地闕魯地

十有二年春正月夏六月壬寅公會杞侯莒子盟于曲

池

秋七月丁亥公會宋公燕人盟于穀丘八月壬辰陳侯

躍卒公會宋公于虛

音墟

冬十有一月公會宋公于龜

曲池魯地穀丘虛龜宋地

丙戌公會鄭伯盟于武父丙戌衛侯晉卒

再言丙戌者羨文也此盟與卒同日爾且經未有一日而再書者此羨文可知

十有二月及鄭師伐宋丁未戰于宋

此公及鄭伯伐宋也不言公者諱之也初宋人執鄭祭仲逐昭公立公子突以親于鄭突既而背宋與魯故宋鄭交怨公七月會宋公燕人盟于穀丘八月會宋公于虛音墟十有一月又會宋公于龜將平宋鄭宋

公不可乃與鄭伯盟于武父以伐宋丁未戰于宋地
以宋則宋與戰可知也不出主名者不與公及鄭伯
伐宋也故以魯鄭自戰為文凡公專尸其事則諱之
此年及鄭師伐宋丁未戰于宋十七年及齊師戰于
奚莊九年及齊師戰于乾時之類是也

十有三年春二月公會紀侯鄭伯已巳及齊侯宋公衛
侯燕人戰齊師宋師衛師燕師敗績

齊以郎之戰未得志于魯因宋鄭之仇故帥衛燕與

宋伐魯魯親紀而比鄭也故會紀侯鄭伯及齊師衛師宋師燕師戰以敗四國之師不地者戰于魯也衛宣未葬惠公出戰其惡可知燕戰稱師重衆也書者惡七國無名之衆殘民以逞不道之甚郎戰在十年三月葬衛宣公夏大水秋七月冬十月十有四年春正月公會鄭伯于曹無水

無水時燠也五行傳曰視之不明是謂不括厥咎舒厥罰常燠

夏五

孔子作春秋專其筆削損之益之以成大中之法豈其日月舊史之有闕者不隨而刊正之哉此云夏五無月者後人傳之脫漏爾

鄭伯使其弟語來盟

來盟者求盟于我也

秋八月壬申御廩災乙亥嘗

嘗秋祭也周之八月夏之六月也其言八月壬申御

廩災乙亥嘗者以不時與災之餘而嘗也以不時與災之餘而嘗此桓之不恭也甚矣

冬十有二月丁巳齊侯祿父卒宋人以齊人蔡人衛人陳人伐鄭

案十二年及鄭師伐宋丁未戰于宋宋人怨突之背已也故以齊人蔡人衛人陳人伐鄭以者乞師而用之也謂四國本不出師宋以力弱不足乞四國之師而伐鄭爾僖二十六年公以楚師伐齊取穀定四年

蔡侯以吳子及楚人戰于栢舉皆此義也然四國從
宋伐鄭助其不道其惡亦可見矣

十有五年春二月天王使家父來求車

天王使家父來求車者諸侯貢賦不入周室材用不
足也

三月乙未天王崩

桓王也

夏四月己巳葬齊僖公五月鄭伯突出奔蔡

突厲公也篡忽立國人不與故出奔蔡凡諸侯不能
嗣守先業以墮厥緒荒怠淫虐結怨于民上下乖離
播越失地自取奔亡之禍者皆生而名之此年鄭伯
突出奔蔡昭二十一年蔡侯朱出奔楚二十三年莒
子庚輿來奔哀十年邾子益來奔之類是也

鄭世子忽復歸于鄭

鄉曰鄭忽出奔衛今日鄭世子忽復歸于鄭者明忽
世嫡當嗣也凡諸侯大夫出奔與執其反國也或書

歸或書復歸或書入或書復入歸者善也復歸不善

也入者惡也復入者甚惡也是故復入重于入入重

于復歸不若歸之之善也書歸善者桓十七年蔡季

自陳歸于蔡成十五年宋華戶駕元自晉歸于宋之

類是也復歸不善者此言鄭世子忽復歸于鄭僖二

十八年衛元咺自晉復歸于衛是也入惡者莊六年

衛侯朔入于衛襄三十年鄭良霄自許入鄭之類是

也復入甚惡者成十八年宋魚石復入于宋彭城襄

二十三年晉欒盈復入于晉之類是也忽世嫡當嗣其言不善者諸侯受國于天子鄭世子忽其奔也祭仲逐之其歸也祭仲反之以其進退在祭仲而不在天子也

許叔入于許

許叔許男弟入者惡入也許叔入于許不言出者非大夫也非大夫故略之凡不言出者皆此義也

公會齊侯于艾邾人牟人葛人來朝

皆微國之君案隱元年公及邾儀父盟于茂莊二十三年蕭叔朝公皆字此稱人者賤其相與朝弑逆之人貶之也

秋九月鄭伯突入于櫟

音歷

鄭世子忽復歸于鄭故鄭伯突入于櫟以偪之櫟鄭邑

冬十有一月公會宋公衛侯陳侯于袤

昌始反

伐鄭

將納突在櫟故公會宋公衛侯陳侯于袤伐鄭袤鄭

地

十有六年春正月公會宋公蔡侯衛侯于曹

未見納突故復會于此

夏四月公會宋公衛侯陳侯蔡侯伐鄭

公與宋衛陳蔡之君比音被謀連兵伐鄭納突其惡可

知也

秋七月公至自伐鄭

助篡伐正踰時而返

冬城向

舒亮反

不時也下言十一月則城向在十月矣周之十月夏之八月也

十有一月衛侯朔出奔齊

衛侯不道國人逐之出奔

十有七年春正月丙辰公會齊侯紀侯盟于黃二月丙

午公會邾儀父盟于趙

翠軌切

黃齊地趙魯地

夏五月丙午及齊師戰于奚

此公及齊師戰也不言公者諱之莊九年及齊師戰于乾時僖二十有二年及邾人戰于升陘刑皆此義也奚魯地

六月丁丑蔡侯封人卒秋八月蔡季自陳歸于蔡

蔡桓侯無子季桓侯弟也其言自陳歸于蔡者桓侯卒蔡季當立時多篡奪明季無惡故曰歸于蔡所以與許叔異也

癸巳葬蔡桓侯

蔡侯爵書者不請諡也

及宋人衛人伐邾冬十月朔日有食之

不言日失之也

十有八年春王正月

桓無王元年二年十年十八年書王者春秋之法王無十年不書也十年無王則人道絕矣是故二百四十二年王無十年不書者也

公會齊侯于濼

盧篤力
角二反

公與夫人姜氏遂如齊

濼之會夫人在是也不言公及夫人會齊侯于濼者
夫人之行甚矣不可言及也不可言及者公弗能制
也後言公與夫人姜氏遂如齊者啟其致禍之由爾
易稱女正位乎內男正位乎外男女正天地之大義
也桓公不能內正夫人之位而與之外如彊齊以取
弑逆之禍宜哉

夏四月丙子公薨于齊

齊侯與夫人姜氏通使人賊公公薨于齊不言弑者
諱之也

丁酉公之喪至自齊秋七月冬十有二月己丑葬我君

山
公

九月而葬桓謚也其曰葬我君桓公者此臣子自謚
以公禮而葬也

春秋尊王發微卷二



覆校官助教臣吳省蘭

校對官檢討臣李學錦

謄錄貢生臣李鍾淑

欽定四庫全書薈要

經部

春秋尊王發微卷三

四

詳校官原任侍講臣王燕緒




欽定四庫全書薈要卷一千二百五十七

經部

春秋尊王發微卷三

宋 孫復 撰


莊公名同桓公子莊王四年即位莊諡也勝敵
克亂曰莊

元年春王正月

不書即位者莊繼桓天子命也閔僖亦如之

三月夫人孫于齊

夫人文姜不言姜氏貶之也其言孫于齊者諱奔也
內諱奔公夫人皆曰孫此年夫人孫于齊閔二年夫
人姜氏孫于邾昭二十五年公孫于齊是也文姜曷
為孫于齊文姜與桓公接練時懼其與祭以是孫于
齊也文姜之惡甚矣臣子雖不可討王法其可不誅
乎故孔子去姜氏以貶之正王法也

夏單伯逆王姬

天子嫁女於齊魯受命主之故使單伯逆王姬不言

如京師者不與公使單伯如京師逆王姬也魯桓見
殺于齊天子命莊公與齊主婚非禮也莊公以親讎
可辭而莊公不辭非子也故交譏之單采地伯字天
子命大夫

秋築王姬之館于外

魯主王姬者非一也王姬之館故有常處此言築王
姬之館于外者知齊讎不可接婚姻也知齊讎不可
接婚姻故築王姬之館于外與其築之于外不若辭

而勿主也夏單伯逆王姬秋築王姬之館于外此公之惡從可見矣

冬十月乙亥陳侯林卒王使榮叔來錫桓公命

賞所以勸善也罰所以懲惡也善不賞惡不罰天下所以亂也桓弑逆之人莊王生不能討死又追錫之此莊王之為天子可知也不書天者脫之榮叔周大夫榮氏叔字

王姬歸于齊齊師遷紀邢

蒲丁反

郟

子斯反

郟吾

齊欲滅紀故遷其三邑

二年春王二月葬陳莊公夏公子慶父帥師伐於餘丘
於餘丘附庸國

秋七月齊王姬卒

外女不卒此卒之者公主其卒也莊公忘父之讎既
主其嫁又主其卒不子之甚也

冬十有二月夫人姜氏會齊侯于禚酌

夫人姜氏會齊侯于禚非禮也禚齊地

乙酉宋公馮卒

三年春王正月溺

乃狄反

會齊師伐衛

溺內大夫之未命者衛侯朔在齊故溺會師伐衛溺會齊師伐衛謀納朔也

夏四月葬宋莊公五月葬桓王

禮天子七月而葬桓王十五年崩至此乃葬甚矣

秋紀季以鄫

攜

入于齊

紀季紀侯弟也鄫紀侯邑也鄫天子所封非紀季可

得有齊欲併紀紀季忘兄之親取兄之邑以事于齊其惡可知也字者非他諸侯之母弟未命者皆字爾蔡叔蔡季之類是也

冬公次于滑

欲救紀也滑鄭地

四年春王二月夫人姜氏享齊侯于祝丘

享當時兩君相見之禮非夫人所宜用也其曰夫人姜氏享齊侯于祝丘甚之也祝丘魯地

三月紀伯姬卒

紀伯姬隱二年紀裂繻所逆內女也禮諸侯絕傍期
姑姊妹女子嫁于國君者尊與已同則為之服大功
九月常事也故內女不卒之此卒者為下紀侯大去
其國六月齊侯葬紀伯姬起

夏齊侯陳侯鄭伯遇于垂紀侯大去其國

大去其國者身與家俱亡之辭也案元年齊師遷紀
邾鄆邾二年紀季以鄆入于齊齊肆吞噬信不道矣

紀侯守天子土有社稷之重人民之衆暗懦齷齪不能死難畏齊強脅棄之而去此其可哉身去而國家盡為齊有故曰紀侯大去其國以惡之也不言齊滅者齊師未嘗加其都城矣不言出奔者非奔也奔者猶有其國家在焉爾若紀侯者身與國家俱亡者也不名者以見齊襄脅逐而去

六月乙丑齊侯葬紀伯姬

伯姬內女紀侯夫人也紀侯大去其國紀無臣子故

齊侯葬紀伯姬齊侯不道逐紀侯而葬伯姬生者逐之死者葬之甚矣齊侯之詐也若此

秋七月冬公及齊人狩于禚

父之讎不共戴天莊公父親為齊殺而遠與齊人狩五年春王正月夏夫人姜氏如齊師

文姜不安于魯故如齊師直曰如齊師不為會禮也

秋邠

五分反國後為小邾

黎來來朝

邠附庸也附庸之君例書字二十三年蕭叔朝公是

也此名者以其土地微陋其禮不足賤之也

冬公會齊人宋人陳人蔡人伐衛

此諸侯伐衛納朔也不言納朔者不與諸侯伐衛納朔也朔行惡甚國人逐之奔齊故天子不使反衛明年王人子突救衛是也公與諸侯連兵不顧王命伐衛納朔故貶諸侯曰某人某人諸侯則公之惡從可見矣朔奔齊在桓十六年

六年春王正月王人子突救衛

王人微者也稱子尊王命也尊王命所以重諸侯之惡也

夏六月衛侯朔入于衛

六月衛侯朔入于衛王人子突不勝諸侯之師也諸侯連兵伐衛王人子突救之不勝諸侯之師故衛侯朔得入于衛天子之威命盡矣公與諸侯之罪不容誅矣故言伐言救言入以著其惡

秋公至自伐衛螟

拒天子伐衛

冬齊人來歸衛俘

此衛寶也其言齊人歸之者齊本主兵伐衛故衛寶先入于齊齊人歸之魯人受之其惡一也

七年春夫人姜氏會齊侯于防

防魯地

夏四月辛卯夜恒星不見夜中星隕如雨

恒星星之常見者也常見而不見此異之大者隕墜

也夜中星隕如雨謂隕墜者衆也

秋大水無麥苗

水不潤下麥與禾黍之苗同時而死故曰無麥苗非謂一災不書傷及二穀乃書也案傷一穀亦書定元年冬十月隕霜殺菽是也此聖人指其所災而實錄

爾

冬夫人姜氏會齊侯于穀

桓公既薨夫人姜氏與齊侯會者數矣三年會于禚

四年饗于祝丘五年如齊師此年春會于防冬會于穀夫人與齊侯之行可知也穀齊地

八年春王正月師次于郎以俟陳人蔡人甲午治兵

先言師次于郎以俟陳人蔡人後言甲午治兵者惡內不知戰也陳蔡將入伐魯出師于郎待之可也以敵之未至而始訓治之此其可哉夫民先教而戰古之道也故孔子曰不教民戰是謂棄之鄉使陳蔡暴至而疾戰則民無所措手足矣

夏師及齊師圍郕成郕降于齊師秋師還

夏及齊師圍郕其言郕降于齊師者齊主兵圍郕制命在齊也故曰郕降于齊師春秋用師多矣未有言師還此言師還者惡其與強讎覆同姓踰時還也

冬十有一月癸未齊無知弑其君諸兒

無知不氏未命也諸兒襄公

九年春齊人殺無知

案隱四年衛人殺州吁于濮此不地者齊人即于國

內殺之也稱人以殺討賊辭

公及齊大夫盟于斲

其器切

公及齊大夫盟納糾也不名齊大夫者公忘讎不復而與齊大夫謀納糾非齊大夫之罪也故斥言公而不名齊大夫文七年公會諸侯晉大夫盟于扈晉大夫不名皆此義也斲齊地

夏公伐齊納子糾齊小白入于齊

夏公伐齊納子糾其言齊小白入齊者小白爭立也

無知之亂管仲召忽以公子糾來奔鮑叔牙以公子小白奔莒小白自莒先入故曰夏公伐齊納子糾齊小白入于齊也言入者皆非世嫡

秋七月丁酉葬齊襄公

九月而葬

八月庚申及齊師戰于乾時音干時我師敗績

此公及齊師戰于乾時也不言公者公伐齊納讎人之子喪師于此此惡之大者諱之也內不言敗此言

我師敗績者羨文蓋後人傳授妄有所增爾

九月齊人取子糾殺之

論語稱桓公殺公子糾召忽死之管仲不死此言齊人取子糾殺之者子糾桓公兄其次當立桓公爭國取而殺之甚矣故曰齊人取子糾殺之所以重桓公之篡也

冬浚洙

音洙

洙水也浚深也冬浚洙畏齊也

十年春王正月公敗齊師于長勺

杓音

報乾時之戰也斥言公者惡其伐齊納糾喪師乾時不自悔過復敗齊師于此也長勺魯地

二月公侵宋

公既敗齊師于長勺又退而侵宋結怨二國

三月宋人遷宿

宿微國天子封之宋人遷之其惡可知

夏六月齊師宋師次于郎公敗宋師于乘丘秋九月荆

敗蔡師于莘以蔡侯獻舞歸

荆為中國患也久矣自方叔薄伐之後入春秋肆禍復甚聖王不作故也此言荆敗蔡師于莘以蔡侯獻舞歸者荆敗蔡師于莘獲蔡侯獻舞歸爾不言獲者不與夷狄獲中國也故曰以蔡侯獻舞歸名者惡遂失國莘蔡地

冬十月齊師滅譚譚子奔莒

譚小國齊師滅之故譚子奔莒不名者譚本無惡也

言奔責不死社稷不言出國滅無所出也

十有一年春王正月夏五月戊寅公敗宋師于鄆

子斯反

此言五月戊寅公敗宋師于鄆者甚之也公二年之中三敗齊宋之師可謂甚矣鄆魯地

秋宋大水

水不潤下也春秋之世災異多矣不可悉書故外災或舉其一或舉其二以見天下之異也此年秋宋大水二十年秋齊大災僖十六年隕石于宋五六鷓力五

反退飛過宋都昭十八年宋衛陳鄭災之類是也

冬王姬歸于齊

羣公受命主王姬者多矣唯元年與此書者惡公忘父之讎再與齊接婚姻也

十有二年春王三月紀叔姬歸于鄆

音携

紀叔姬伯姬之媵也鄆紀季之邑也四年紀侯大去其國叔姬至此而歸于鄆者歸于季也歸者嫁辭以伯姬之媵而歸于季非其所歸也亂也

夏四月秋八月甲午宋萬弒其君捷及其大夫仇牧

萬不氏未命也及其大夫仇牧甚之之辭也與桓二

年宋督義同

冬十月宋萬出奔陳

弒君之賊當急討之萬八月弒莊公十月出奔陳宋
之臣子緩不討賊若此

十有三年春齊侯宋人陳人蔡人邾人會于北杏

北杏之會桓公獨書爵者孔子傷周道之絕也桓公

既入乘天子衰季將霸諸侯攘夷狄救中國以尊周
室乃合宋人陳人蔡人邾人于此首圖大舉夫欲責
之深者必先待之重故北杏之會獨書其爵以與之
北杏齊地

夏六月齊人滅遂

此桓公滅遂也其稱人者以其救中國之功未見滅
人小國貪自封殖貶之也何哉桓公貪土地之廣恃
甲兵之衆驅逐逼脅以強制諸侯懼其未盡從也約

之以會要之以盟臨之以威束之以力有弗徇者小則侵之伐之甚則執之滅之其實假尊周之名以自封殖爾故此年滅遂十四年伐宋十五年伐郟十六年伐鄭十九年伐我西鄙二十年伐戎二十六年伐徐二十八年伐衛三十年降鄆閔元年救邢二年遷陽皆稱人以切責之遂小國

秋七月冬公會齊侯盟于柯

冬公會齊侯盟于柯公不及北杏之會桓既滅遂懼

其見討也故盟于此柯齊地

十有四年春齊人陳人曹人伐宋

諸侯伐宋宋人背北杏之會也

夏單音善伯會伐宋

此公使單伯會伐宋也桓以諸侯伐宋本不期會魯
自畏齊桓故夏使單伯會伐宋三國稱人獨書單伯
者吾大夫不可言魯人故也

秋七月荆入蔡

荆入蔡齊桓未能救中國也

冬單伯會齊侯宋公衛侯鄭伯于鄆音春

此桓既服宋會單伯宋公陳侯衛侯鄭伯于鄆也經

以單伯主會為文者凡會盟公或大夫往則皆以魯

主會為文春秋魯史故也內不與則曰某人某人會

于某十五年齊侯宋公陳侯衛侯鄭伯會于鄆昭二

十七年晉士鞅宋樂祁黎衛北宮喜曹人邾人滕人

會于扈之類是也鄆衛地

十有五年春齊侯宋公陳侯衛侯鄭伯會于鄆夏夫人姜氏如齊

齊侯既死文姜不安于魯故如齊

秋宋人齊人邾人伐邾

宋主兵故序齊上邾宋附庸叛故伐之

鄭人侵宋冬十月

十有六年春王正月夏宋人齊人衛人伐鄭

鄭背鄆之會侵宋故齊桓帥諸侯伐之齊序宋下者

與伐邠義同

秋荆伐鄭

荆伐鄭桓未能救中國可知也

冬十有二月會齊侯宋公陳侯衛侯鄭伯許男滑伯滕子同盟于幽

會公會也同者同畏桓也桓非命伯伐鄭之後兵威既振于是諸侯乃相與畏服焉不言公者諱之也然桓會多矣不可皆不見公故于此一諱之也

邾子克卒

邾稱爵者始得王命列為諸侯也

十有七年春齊人執鄭詹

稱人以執惡桓也詹不氏未命也桓十二月與鄭伯
同盟于幽而春執鄭詹安用同盟不稱行人者會未
歸而見執也不言以歸者秋鄭詹自齊逃來以歸可
知也

夏齊人殲于遂

齊人殲于遂不戒也齊侯滅人之國使人戍之而不戒焉此自殲之道也噫齊人殲于遂自殲也鄭棄其師自棄也

秋鄭詹自齊逃來

鄭詹自齊逃來未得歸于鄭也言逃來懼齊之甚

冬多麋

反忙悲

麋山澤皆有言多者以多為異爾

十有八年春王三月日有食之

不言朔不言日日朔俱失之也

夏公追戎于濟西

案僖二十六年齊人侵我西鄙公追齊師至于鄆弗
及先言侵而後言追此不言侵伐者明不覺其來已
去而追之也書者譏內無戎備

秋有蝥

又作蠹音
或短狐也

蝥舍沙射人為災

冬十月

十有九年春王正月夏四月秋公子結媵陳人之婦于鄆遂及齊侯宋公盟

媵書者為遂事起也公子結受命媵陳人之婦不受命與齊侯宋公盟結媵命專盟故曰遂以惡之非謂大夫出境有可以安社稷利國家專之可也案僖三十年公子遂如京師遂如晉襄二年仲孫蔑會晉荀瑩齊崔杼宋華元衛孫林父曹人邾人滕人薛人小邾人于戚遂城虎牢孔子皆譏之何獨與公子結也

若以書至鄆為出境乃得專之則公子遂自京師如
晉仲孫蔑會晉荀瑩自戚城虎牢豈非出境也哉况
秋與齊侯宋公盟而冬齊人宋人陳人加兵于魯非
所謂可以安社稷利國家也陳稱人者媵不當書故
略言之也

夫人姜氏如莒冬齊人宋人陳人伐我西鄙

桓帥宋陳伐我西鄙討鄭詹也

二十年春王二月夫人姜氏如莒

文姜行惡比年如莒

夏齊大災

災火災也言大者其災甚也

秋七月冬齊人伐戎

二十有一年春王正月夏五月辛酉鄭伯突卒秋七月
戊戌夫人姜氏薨冬十有二月葬鄭厲公

八月而葬

二十有二年春王正月肆大眚

所景反

肆放也。眚過也。肆大眚者，罪惡無不赦之辭也。書稱眚災肆赦，易曰赦過宥罪，此天子之事也。天子尚爾，況諸侯乎？莊公肆大眚，非正也。亂法易常者也。

癸丑葬我小君文姜，陳人殺其公子御寇。

春秋之義，非天子不得專殺。此言陳人殺其公子御寇者，譏專殺也。是故二百四十二年無天王，殺大夫、文書諸侯，殺大夫者四十七也。何哉？古者諸侯之大夫皆命于天子，諸侯不得專命也。大夫有罪，則請于

天子諸侯不得專殺也大夫猶不得專殺況世子母

弟乎春秋之世國無大小其卿大夫士皆專命之有

罪無罪皆專殺之其無王也甚矣故孔子從而錄之

以誅其惡觀其專殺之罪雖一而重輕之惡有三殺

世子母弟則稱君稱君者甚之也殺大夫不以其罪

則稱國稱國者次之也殺有罪則稱人稱人者又次

之也殺世子母弟稱君者僖五年晉侯殺其世子申

生襄二十六年宋公殺其世子痤

才禾反

三十年天王

殺其弟佞夫之類是也殺大夫不以其罪稱國者僖
七年鄭殺其大夫申侯文六年晉殺其大夫陽處父
宣九年陳殺其大夫洩冶之類是也殺有罪稱人者
此年陳人殺其公子御寇文九年晉人殺其大夫士
穀戶木反昭八年陳人殺其大夫公子過之類是也

夏五月

春秋未有以五月首時者此言夏五月者蓋五月之
下有脫事爾

秋七月丙申及齊高傒盟于防

此公盟也不言公者高傒伉也高傒敵公而盟伉孰甚焉

冬公如齊納幣

母喪未終其惡可知也

二十有三年春公至自齊祭側界反叔來聘

祭叔來聘非天子命也故不言使其曰來聘惡外交也祭叔周大夫祭采地叔字

夏公如齊觀社

諸侯非享覲不踰境公如齊觀社非禮也

公至自齊荆人來聘

荆十年敗蔡師于莘始見于經十四年入蔡十六年
伐鄭皆曰荆此稱人者以其能慕中國修禮來聘少
進之也

公及齊侯遇于穀蕭叔朝公

諸侯相朝非禮也朝于內猶曰不可況朝于外乎故

曰公及齊侯遇于穀蕭叔朝公以交譏之蕭附庸國

叔字

秋丹桓宮楹冬十有一月曹伯射

音亦又音夜

姑卒十有二

月甲寅公會齊侯盟于扈

公會齊侯盟于扈謀逆姜氏也公二年之中納幣觀

社及齊侯遇于穀比犯非禮今又會盟于扈甚矣扈

齊地

二十有四年春王三月刻桓宮楹

公將納夫人故飾宮廟以夸侈之秋丹桓宮楹春刻
桓公桷皆非禮也案成三年二月甲子新宮災者親
廟切近不忍稱其謚此斥言丹桓宮楹刻桓公桷者
惡莊不子忘父之怨侈宗廟以夸讎女也

葬曹莊公夏公如齊逆女

常事書者以見公婚之不時也案桓六年九月丁卯
子同生公十四年即位此年如齊逆女公即位二十
四年年三十七歲矣公即位二十四年年三十七歲

始得成婚于齊者文姜制之不得以時而婚爾故其
母喪未終如齊納幣圖婚之速也

秋公至自齊八月丁丑夫人姜氏入

公親迎于齊不俟夫人而至失夫之道也婦人從夫
者也夫人不從公而入失婦之道也夫不夫婦不婦
何以為國非所以奉先公而紹後嗣也不亂何待故
曰秋公至自齊八月丁丑夫人姜氏入以惡之

戊寅大夫宗婦覲用幣

大夫宗婦者同宗大夫之婦也覲見也夫人姜氏既入莊公欲夸寵之故使同宗大夫之婦用幣以見非謂大夫宗婦同贄而見也故不言及夫三帛二生一死男子之贄也婦人榛栗棗脩告虔而已公使大夫宗婦覲用幣甚矣

大水冬戎侵曹曹羈出奔陳赤歸于曹郭公

杜預謂羈曹世子赤曹僖公者以桓十一年宋人執鄭祭仲突歸于鄭鄭忽出奔衛其文相類爾案史記

曹世家及年表僖公名夷至如公羊穀梁言赤郭公
名者理亦不安竊謂去聖既遠後人傳授文有脫漏
爾故其義難了

二十有五年春陳侯使女汝叔來聘

女叔不名天子之命大夫也女氏叔字

夏五月癸丑衛侯朔卒六月辛未朔日有食之鼓用牲
于社

案日食三十六書鼓用牲者三此年六月辛未朔日

有食之鼓用牲于社三十年九月庚午朔日有食之
鼓用牲于社文十五年六月辛丑朔日有食之鼓用
牲于社是也鼓常事書者止譏其用牲耳

伯姬歸于杞

隱二年書紀裂繻來逆女此不言逆者天下日亂婚
禮日壞逆者非大夫也逆者非大夫故不言逆僖二
十五年季姬歸于鄆成九年伯姬歸于宋之類是也
秋大水鼓用牲于社于門

鼓用牲于社于門非禮也

冬公子友如陳

如陳者聘也內朝聘皆曰如

二十有六年春公伐戎夏公至自伐戎曹殺其大夫

稱國以殺不以其罪也不書名氏者脫之僖二十五
年宋殺其大夫皆此義也

秋公會宋人齊人伐徐冬十有二月癸亥朔日有食之

二十有七年春公會杞伯姬于洮

他刃反

公會杞伯姬于洮非禮也洮魯地

夏六月公會齊侯宋公陳侯鄭伯同盟于幽

孔子稱桓公九合諸侯不以兵車管仲之力也案桓

公之會十有五十三年會北杏十四年會鄆卷十五

年會鄆十六年會幽此年會幽僖元年會榿赤呈反二

年會貫三年會陽穀五年會首止七年會甯母八年

會洮九年會葵丘十三年會鹹十五年會牡丘十六

年會淮是也孔子止言其九者蓋十三年會北杏桓

始圖伯其功未見十四年會鄆又是伐宋諸侯闕僖
八年會洮十三年會鹹十五年會牡丘十六年會淮
皆有兵車也故止言其會之盛者九焉此聖人貴禮
義賤武力之深旨也

秋公子友如陳葬原仲

大夫非君命不越境公子友如陳葬原仲非禮也原
仲陳大夫字者天子命大夫也

冬杞伯姬來

歸寧常事也故不書焉凡內女直曰來者惡其無事而來也

莒慶來逆叔姬

不言來逆女者惡其成禮于魯也案婚禮親迎至夫國而後成禮莒慶成禮于魯故不言逆女以斥之叔姬莊公女宣五年齊高固來逆叔姬同義

杞伯來朝公會齊侯于城濮

音卜

城濮衛地

二十有八年春王三月甲寅齊人伐衛衛人及齊人戰
衛人敗績

前年公會齊侯宋公陳侯鄭伯同盟于幽衛侯不至
故齊人伐衛衛人及齊人戰衛不服罪也以衛主齊
者衛受伐也春秋之義伐者為客受伐者為主故曰
衛人及齊人戰不地者戰于衛也敗稱師此稱人者
不以師敗乎人也

夏四月丁未邾子瑣卒秋荆伐鄭公會齊人宋人救鄭

荆二十三年來聘稱人此不稱人者以其創艾中國復狄之也

冬築郿

音眉

功大曰城小曰築

大無麥禾

冬書大無麥禾者簡言之也此秋大無麥冬大無禾爾不可言秋大無麥冬大無禾故簡言之也書曰土爰稼穡稼穡作甘大無麥禾土失其性也穀於民食

最重也

臧孫辰告糴于齊

不言如齊者不與莊公使臧孫辰告糴于齊也上言大無麥禾則百姓飢矣其言不與莊公使臧孫辰告糴于齊者病莊公也莊公為國久矣古者三年耕必有一年之畜九年耕必有三年之畜三十年通之雖有水旱蟲螟民無不足者莊公為國二十八年而無一年之畜非所以為國也臧孫辰公子彊起侯曾孫反

二十有九年春新延廡

惡不愛民也冬大無麥禾臧孫辰告糴于齊則民飢矣延廡雖壞未新可也莊公春新延廡不愛民力若此

夏鄭人侵許秋有蜚

扶味反

冬十有二月紀叔姬卒

叔姬十二年歸于鄫携卒于鄫

城諸及防

三十年春王正月夏師次于成秋七月齊人降鄆音章

案八年師及齊師圍郕郕降于齊師先言圍而後言降此直書齊人降郕者惡齊強脅且見郕微弱不能伉齊之甚也

八月癸亥葬紀叔姬

媵而卒葬之者歸于鄫卒于鄫皆非其所也

九月庚午朔日有食之鼓用牲于社

凡救日食鼓禮也用牲非禮也孔子書鼓用牲者止譏其用牲耳非謂九月不鼓也

冬公及齊侯遇于魯濟

子禮反

齊人伐山戎

三十有一年春築臺于郎夏四月薛伯卒築臺于薛六月齊侯來獻戎捷

戎捷伐山戎之所得也齊侯來獻戎捷非禮也

秋築臺于秦

莊比年興作今又一歲而三築臺妨農害民莫甚乎此薛秦魯地也

冬不雨

三十有二年春城小穀

魯邑曲阜西北有小穀城

夏宋公齊侯遇于梁丘秋七月癸巳公子牙卒

公子牙桓公子莊公庶弟

八月癸亥公薨于路寢

路寢正寢公薨于路寢正也凡公薨皆書其所在者
謹凶變也

冬十月己未子般卒

子般莊公太子未踰年之君也莊公未葬故不名薨
不地者降成君也此與襄三十一年秋九月癸巳子
野卒義同

公子慶父如齊狄伐邢

春秋尊王發微卷三